



DEDICATIO.



Quanta Philænorum fuerit concordia fratrum,
Pro patria claram qui subiére necem,
Sedula miratrix meritorum cana Vetustas,
Laudibus attonitâ posteritate, canit.
Cur geminus Castor, geminus cur nomine Pollux
Audiat, haud unquam dignus uterque mori,
Et Veteres titulo venerentur sæpius uno,
Diversos norunt quos tamen esse duos,
Nemo, nisi nostris nimium peregrinus & hospes,
Fortassis poterit non meminisse, sacris.
Æmula Laus illud nomen facit, æmula Virtus,
Æmulus alterno pectore junctus Amor;
Mentibus & trepidis aliorum sæpe per orbem
His à Tyndaridis fratribus orta salus.
Illa salus toties bellis spectata Quiritum;
Illa tot in creperis rebus amica fides;

A 3

Seva-

Sevaeque Ventorum tumido procul agmina ponto,

Alba simul nautis stella refulsit, agens.

Dum fugiunt nubes, saxis agitatus & humor

Defluit, & pelago concidit unda minax.

Pulcra, nisi fallor, Vestrae pietatis imago:

Pulcra, nec eventu saepe probata nimis.

SVMERMANNIADÆ, Fratrum duo nomina, quondam

Deliciae Matris, deliciaeque Patris.

Ordinis & Vestri verè nova lumina, sacra

Dantia grande decus, grande datura Togæ.

Unde sibi miseri, sceleratos læpius ungues

Vulturis infandi questa caterva, Rei,

Unde laborantes dubiis in rebus oborta

Querere suppetias post mala posse putant;

Et sibi consilium promittere semper opemque,

Auxiliatricis maxima dona manus.

Pergite lucentem generosæ mentis & altæ

Promere tam mirâ dexteritate facem.

Pergite candoris, summæ virtutis, & artis

Plurima per populos signa relicta dare.

Et, scio, pergetis: nota est mihi gloria, notus

Ille carens maculis integritatis honor:

Ille laborantes miti pietate juvandi,

Ille retundendi crimina victa calor:

Magnaque tot studiis rerum collecta supellex,

Nullius & pravi conscia Vestra fides;

Judicioque gravi suffultum mentis acumen,

Nec delassatus nocte dieque labor,

Segni-

Segnities nullo Siren cui blanda veneno,
Nulla Voluptatis retia dira nocent;
Tantaque sedulitas, cujus PATER ipse stupendum
Exemplar VOBIS, calcar & ante dedit.
Hujus inexstinctas imitari pectore laudes,
Et varias dotes creditis esse parum:
Ni simul, Elysiis campis plaudente vel ipso
Patre, decus tantum vincere cura foret.
Ausus Alexander sic & virtute Philippo,
Pellæus juvenis nempe præire seni.
Ægea sic Theseus, sic Atrea vincere dictus,
Rex Regum, titulis dux Agamemno suis.
Pelea sic magnam major superavit Achilles:
Sic veterem natus Jupiter ipse patrem.
Aut, modò si priscis sociare recentia filo
Carminis, & magnis jungere parva licet,
Heinsius Heinsiadæ sic victus imagine vates,
Grandisonam quamvis tractet uterque tubam.
Hunc raptum tenui quoniam sermone Parentem,
Magnaque præclari diximus acta Viri,
Exiguum VOBIS, nullâ licet arte, libellum,
Quo decet, officio consilioque damus.
Illud amicitia, quâ me dignata fuerunt
Aurea jamdudum pectora Vestra, genus,
Ille favor mentis, simul & proluxa voluntas
Amborum toties testificata mihi;
Quaque gravis Genitor Vester, dignissimus ævo
Cernere Nestoreos ulteriore dies,

*In loca me juvenem prius huc peregrina vocatum
 Complexus, nullo conciliante, fuit,
 Quæque foret memori jucundum plura referri,
 Officio stimulos addere visa meo.*
 VOS modò, quæ Vestra est bonitas, qui nobilis ardor
 Augendi quarvis prosperitate bonos,
 Et studiis pretium statuendi rite, sacrisque
 Artibus Aonii Palladiique gregis,
 Dicere si liceat, mihi quam monstrastis amicam
 Sæpe voluntatem, continuate meis.
 Et simul has tradi tenues permittite chartas,
 Sinceræ veluti parva tributa manus:
 Gesta quibus Vestri memorantur magna Parentis,
 Non Styge, Lethéo non abolenda vado:
 Aptæ Senis tanti vivax extendere nomen,
 Et stimulos aliis addere luce suâ.



AVDI.